

## Pengaruh Komunikasi Strategik ke atas Keberkesanan Penyampaian Mesej

MAIZATUL HAIZAN MAHBOB  
WAN IDROS WAN SULAIMAN  
WAN AMIZAH WAN MAHMUD  
*Universiti Kebangsaan Malaysia*

### ABSTRAK

Komunikasi strategik merupakan suatu bentuk tindakan berstrategi dan sangat penting untuk pembangunan organisasi kerana komunikasi dianggap sebagai penyumbang utama kepada kecekapan organisasi. Tujuan utama kajian ini adalah bagi mengenal pasti pola komunikasi yang digunakan, menganalisis sejauh mana pola komunikasi mempunyai hubungan dengan amalan komunikasi strategik serta menganalisis sejauh mana elemen komunikasi strategik iaitu perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja mempengaruhi keberkesanan mesej yang disampaikan dalam kalangan kakitangan KTMB. Penetapan elemen tersebut adalah bersandarkan kepada Model Komunikasi Strategik Barret (2002). Model Barret ini telah diubah suai oleh pengkaji dengan menambah dua lagi elemen iaitu perancangan komunikasi dan budaya kerja. Untuk tujuan kajian ini, sebanyak 28 aduan yang dihantar oleh pengguna KTMB dianalisis menggunakan kaedah analisis kandungan. Kemudian, survei pula dijalankan ke atas 200 responden yang terdiri daripada kakitangan komuter di Lembah Klang. Hasil kajian mendapati pengguna kerap menghantar aduan dan kebanyakan aduan berkait dengan pengurusan perkhidmatan dan budaya kerja. Pada masa yang sama, KTMB banyak mengamalkan pola komunikasi mendatar dan komunikasi luar organisasi berbanding pola komunikasi menegak dan berpenjuru. Melalui analisis korelasi, hasil kajian mendapati terdapat hubungan sederhana kuat antara pola komunikasi dengan komunikasi strategik. Manakala, bagi analisis regresi pula menunjukkan elemen komunikasi strategik mempengaruhi sebanyak 56 peratus varians terhadap keberkesanan penyampaian mesej.

**Kata kunci:** *Komunikasi strategik, penyampaian mesej, pengurusan, kakitangan, komunikasi keorganisasian.*

## The Influence of Strategic Communication on the Effectiveness of Message Delivery

### ABSTRACT

Strategic communication is a form of strategic action and very important for organisational development as it regarded as a major contributor to organisational efficiency. The main purpose of this study is to identify communications pattern used, to analyse the relationship between communications pattern and strategic communication as well as to analyse the strategic communication elements such as communication planning, top management support, targeted messages, selection and use of communication tools, on-going assessment and work culture that influence the effectiveness of message delivery among KTMB staff. The determination of these elements was based on Strategic

Communication Model by Barret (2002). Barret's model has been modified by adding two more elements namely communication planning and work culture. For the purpose of this study, a total of 28 complaints about commuter services sent via email by KTMB customers were collected and analysed. Then, a survey was conducted on 200 respondents among commuter staff to identify the communication pattern used and how strategic communication was practiced in KTMB. The findings showed that customers often complaint to KTMB and most of the complaints are related to service management and work culture. At the same time, KTMB was practiced horizontal communication and external communication compared to vertical and diagonal communication patterns. Through correlation analysis, the study found that there is a positive relationship between communication patterns and strategic communication. Meanwhile, regression analysis showed that strategic communication elements had influence a total of 56 percent variant towards effectiveness of message delivery.

**Keywords:** Strategic communication, message delivery, management, staff, organizational communication.

#### PENGENALAN

Komunikasi menjadi aspek utama yang dititikberatkan bagi menjamin matlamat organisasi berjaya dicapai. Komunikasi dapat difahami sebagai pemindahan makna dari satu individu kepada individu yang lain atau ramai individu, sama ada secara lisan atau bukan lisan. Komunikasi dari satu individu kepada individu yang lain biasanya digambarkan sebagai sebuah segitiga yang terdiri daripada konteks, pengirim, mesej dan penerima (Barret, 2006). Hal ini boleh dilihat apabila komunikasi memberi pengaruh yang cukup penting dalam memastikan perjalanan aktiviti dalam organisasi berjalan dengan lancar. Elemen komunikasi pula melibatkan penghantaran mesej, penerima, mesej dan saluran (Ab. Aziz, 2010). Disebabkan itu, komunikasi yang jelas adalah sangat penting untuk memastikan kefahaman penerima mengenai mesej yang disampaikan (Butler, 2010).

Hal ini bertepatan dengan peranan komunikasi itu sendiri yang berfungsi untuk memberitahu, mempengaruhi, menyampaikan niat dan untuk membangunkan kredibiliti (Walker, 2011) serta untuk memenuhi keperluan, menyerlahkan diri sendiri, mewujudkan hubungan dan bertukar-tukar maklumat (Zawiyah, 2009). Disebabkan itu, komunikasi menjadi aspek penting dalam hubungan keorganisasian yang bukan sahaja antara organisasi dengan organisasi, malah turut menjadi pemangkin utama yang mencetuskan hubungan erat antara pihak atasan dengan pihak pengurusan bawahan (Wan Idros & Maizatul, 2015). Justeru itu, dalam proses komunikasi, mesej turut menjadi aspek terpenting dalam mewujudkan komunikasi dan sistem penyampaian yang berkesan.

Selaras dengan itu, organisasi menjadi satu kumpulan individu yang bekerjasama untuk mencapai matlamat yang mustahil dicapai secara bersendirian (Abdul Mua'ti, 2006). Ini kerana, organisasi yang cekap pentadbirannya memerlukan kerjasama daripada semua ahli (Mohamad Said & Zulhamri, 2012). Melalui pendekatan komunikasi, organisasi dapat menyampaikan maklumat dengan mudah dan dapat memberi pengetahuan kepada kakitangan dan masyarakat mengenai sesuatu isu. Kewujudan etika kerja yang betul dan ditambah dengan amalan komunikasi yang cekap, maka tidak mustahil segala arahan, hubungan kakitangan dan majikan serta konflik dapat dilaksana dan diselesaikan dengan baik (Wan Idros, 2015).

Oleh yang demikian, organisasi perlu mengatur komunikasi secara berstrategik bagi mengelak sebarang kepincangan yang boleh mengakibatkan mesej yang ingin disampaikan tidak dapat diurus dengan baik. Hal ini, bertepatan dengan konsep komunikasi strategik itu sendiri yang didefinisikan sebagai pilihan komunikasi tahap makro yang dibuat berdasarkan matlamat organisasi dan pertimbangan dari reaksi khalayak. Antara konsep yang dibicarakan mengenai strategi komunikasi ialah komunikator dengan jelas atau secara tersirat memilih apa yang perlu dibincangkan, dan apa yang harus diabaikan. Strategi juga melibatkan penetapan matlamat dan jangkaan tindak balas orang lain. Di samping itu, strategi secara semula jadi berfungsi sebagai asas untuk tindakan, iaitu menyediakan asas untuk penstrukturran, pelaksanaan, dan penilaian amalan komunikasi. Pemilihan forum komunikasi, mesyuarat suku tahunan, e-mel syarikat, dan lain-lain secara semulajadinya berasal dari strategi (Clampitt, 2005).

Menerusi komunikasi secara berstrategi, organisasi memperoleh komunikasi yang berkualiti hasil daripada interaksi yang berkesan antara pihak pengurusan dan kakitangan (Mohd Zuri & Aznan, 2008). Hal utama yang perlu diaplikasikan adalah penggunaan bahasa yang mudah difahami, menggalakkan kakitangan memberikan idea, arahan yang jelas serta suasana kondusif di tempat kerja. Ini kerana, strategi komunikasi turut termasuk dalam teras utama komunikasi, dan strategi menjadi asas di mana setiap komunikasi yang berkesan bergantung kepada perancangan secara berstrategik. Pemimpin juga perlu menganalisis khalayak dalam setiap situasi dan membangunkan strategi yang dapat mencapai matlamat (Barret, 2006). Di samping itu, Barret juga menekankan bahawa komunikasi yang baik bergantung kepada strategi, tetapi apabila khalayak menjadi pelbagai dan lebih besar lingkungannya, maka strategi komunikasi menjadi lebih rumit.

Seperti kebanyakan disiplin komunikasi yang lain, pendekatan membangunkan strategi komunikasi merangkumi elemen seperti konteks, visi, matlamat dan objektif, wawasan, pilihan strategik, *stakeholders*, mesej atas talian, *outline of approach*, sumber, kebergantungan, risiko dan tanggapan (Government Communication Service, 2014). Upik (2016) menjelaskan bahawa strategi komunikasi diperlukan untuk mencapai tujuan tertentu kerana ia adalah penting dalam memberi informasi kepada sasaran. Menurut Upik lagi, ia dilaksanakan bertujuan untuk memastikan penerima memahami mesej dan dapat memotivasi penerima untuk melakukan perubahan.

Seterusnya, bagi memastikan penyampaian mesej berkesan, kita perlu sedar bahawa komunikasi melibatkan penyampaian idea dan perasaan dengan cara yang mudah untuk difahami. Oleh kerana komunikasi merupakan proses dua hala, maka pengurus dalam sesebuah organisasi bukan hanya bertindak sebagai penyampai maklumat, sebaliknya dalam keadaan yang lain juga merupakan sasaran kepada penerimaan maklumat (Che Hasniza & Ab Aziz, 2011). Tambahan pula, asas komunikasi yang efektif mempunyai empat landasan, iaitu pertama, kita perlu mengembangkan sikap komunikasi yang positif. Kedua, mesti berusaha untuk mendapatkan maklumat. Ketiga, perlu merancang untuk berkomunikasi, dan perlu melakukannya pada awal tindakan. Akhirnya, perlu membangunkan kepercayaan antara penghantar dan penerima (Newstrom, 2015). Selain daripada itu, komunikasi yang efektif terjadi apabila terdapat interaksi dua arah antara dua pihak. Pertukaran maklumat dari satu pihak ke pihak yang lain adalah komunikasi yang baik apabila berlaku perbincangan dan

penerima boleh bertanya soalan dan menerima jawapan untuk menjelaskan mesej tersebut. Komunikasi yang efektif juga merupakan prasyarat untuk melaksanakan strategi organisasi dengan lebih teratur (Kartini et al., 2012).

Oleh yang demikian, pihak atasan perlu berkomunikasi dengan cara yang berkesan dalam menginterpretasikan maklumat yang ingin disampaikan bagi mengelakkan kekeliruan. Maklum balas yang diberikan dilihat sebagai pemangkin interpretasi maklumat yang betul daripada kakitangan bawahan terhadap arahan kerja daripada majikan. Impak corak penerimaan maklumat dan cara kakitangan menginterpretasikan maklumat yang diterima akan memberikan kesan langsung terhadap cara kerja, sikap dan pentadbiran organisasi (Wan Idros & Maizatul Haizan, 2014). Panduan ke arah komunikasi berkesan juga menunjukkan bahawa kita harus memastikan semua orang tahu siapa yang sepatutnya diberitahu, mempertimbangkan penerima maklumat, ketahui siapa penerima maklumat, cari dan pilih maklumat, pilih medium yang bersesuaian, mesej yang jelas, guna nada yang betul serta mesej tersebut hendaklah ringkas dan mudah untuk difahami oleh penerima (Che Hasniza & Ab Aziz, 2011).

#### SOROTAN LITERATUR DAN KERANGKA TEORI

Komunikasi strategik adalah bidang pembelajaran yang baru muncul dalam ruang lingkup komunikasi dan pengurusan sains sosial (Thomas & Stephens, 2015). Melalui perbandingan yang dijalankan terhadap kajian komunikasi strategik, Malaysia masih kurang penyelidikan mengenainya berbanding di luar negara. Jika dilihat dari sudut pelaksanaan komunikasi, kebanyakan organisasi di Malaysia masih kurang mengambil berat mengenai kepentingan strategi dalam berkomunikasi. Dalam bidang kajian komunikasi strategik, pengkaji banyak membahas dan mencari solusi dalam isu komunikasi keorganisasian dengan memfokuskan kepada khalayak dalaman dan luaran. Oleh yang demikian, keperluan strategi komunikasi timbul bagi mencapai matlamat. Sesebuah organisasi perlu menyelesaikan masalah yang berkaitan dan mengenal pasti sumber serta sokongan dari persekitaran dalaman dan luaran. Ini kerana, komunikasi strategik dapat meningkatkan komitmen organisasi dalam kalangan pihak berkepentingan dengan kesan yang dilihat ke atas khalayak luaran (Ressler, 2012).

Ini kerana, pertama komunikasi strategik sangat penting untuk pembangunan organisasi dan komunikasi dianggap sebagai penyumbang kepada keberkesanan organisasi. Kedua, berkait dengan kepentingan imej organisasi. Ketiga, berperanan sebagai alat bagi meningkatkan identiti organisasi dalam kalangan kakitangan. Terakhir, berkait dengan keterbukaan antara ahli organisasi dan antara organisasi dengan pihak berkepentingan (Falkheimer, 2014). Sementara itu, Day et al. (2017) menyatakan bahawa apabila kurangnya komunikasi secara berstrategik, akan menyebabkan tahap kepercayaan menurun dan menimbulkan konflik emosi dalam kalangan ahli organisasi. Penyelesaian yang perlu diambil adalah dengan memilih strategi komunikasi yang tepat bagi memastikan kestabilan dalam organisasi.

Secara umumnya, komunikasi strategik boleh dikaitkan dengan kaedah ataupun cara yang dipilih oleh organisasi untuk diguna pakai dalam sesuatu strategi komunikasi dalam organisasi. Namun, organisasi juga perlu mewujudkan perancangan. Mahoney (2013) berpendapat elemen perancangan komunikasi strategik perlu mengandungi penganalisisan situasi, penetapan matlamat, mesej, sasaran khalayak, strategi komunikasi, taktik, pelaksanaan dan penilaian. Menurut beliau lagi, organisasi perlu fokus terhadap perancangan komunikasi

strategik dengan mengambil kira apa yang perlu dilakukan, apa isu yang akan dihadapi, mengapa ia penting, apa yang perlu dilakukan dengan perkara tersebut, siapakah individu terpenting berkenaan perkara tersebut, apa yang perlu diberitahu dan bagaimana harus memberitahu. Disebabkan itu, mesej dalaman merupakan antara organ terpenting dalam tadbir urus organisasi. Dengan mengambil kira elemen tersebut, perancangan komunikasi dapat berjalan dengan lancar khususnya semasa penyelarasan fungsi organisasi (Bharadwaj, 2014).

Di samping perancangan komunikasi yang perlu ada, organisasi juga perlu melihat dan menilai budaya kerja yang wujud dalam persekitaran kerja seharian. Ini kerana, budaya dalam sesebuah organisasi berkait rapat tentang bagaimana kakitangan mempersepsikan aspek budaya dalam organisasi dan ia akan mewarnai cara bertindak dalam aktiviti kerja kakitangan sehari-hari. Organisasi yang mempunyai budaya yang kuat akan mempengaruhi setiap tindakan kakitangan (Mujiasih & Ratnaningsih, 2012). Meskipun begitu, aspek budaya turut termasuk dalam rangka 7S (*structure, strategy, systems, shared values, skills, staff and style*) yang mesti ada dalam pelaksanaan strategi organisasi (Peters & Waterman, 1992).

Dalam Model Komunikasi Strategik Barret (2002), beliau mengetengahkan elemen sokongan pengurusan atasan, mesej bersasaran, pemilihan dan penggunaan alat komunikasi serta penilaian berterusan. Elemen dalam model tersebut digunakan dalam kajian ini bagi mengukur boleh ubah komunikasi strategik terhadap keberkesanan penyampaian mesej. Pengkaji turut menambah dua lagi elemen, iaitu perancangan komunikasi dan budaya kerja. Ini kerana, dua elemen tersebut merupakan elemen penting yang perlu ada dalam sesebuah strategi komunikasi. Pengkaji juga ingin menguji dan melihat adakah elemen tersebut turut mempengaruhi keberkesanan penyampaian mesej ataupun tidak.

Berbalik kepada elemen dalam Model Komunikasi Strategik, elemen pertama dalam model tersebut iaitu sokongan pengurusan atasan, merupakan perbuatan memberi galakan kepada kakitangan daripada pihak pengurusan yang berada di peringkat atasan dalam hierarki organisasi dan bertanggungjawab ke atas keseluruhan organisasi (Aizzat, 2006). Sokongan yang diberikan bukan sahaja dalam bentuk persetujuan, malah dari segi penglibatan (Zafir & Fazilah, 2003). Kajian yang dijalankan oleh Low, Siti Zaleha dan Hishamuddin (2007) menunjukkan bahawa dengan melibatkan kakitangan dalam proses membuat keputusan bersama, kakitangan dapat mengemukakan pendapat dengan bebas, berbincang dan berkongsi idea. Proses ini membenarkan interaksi antara kakitangan berlaku dan lebih banyak idea serta pendapat yang kreatif dapat dihasilkan.

Manakala, mesej bersasaran merupakan elemen kedua yang lebih spesifik kepada khalayak yang diinginkan bagi memastikan mesej sampai kepada sasaran (Pate & Buchner, 2013). Menurut Griffin dan Ebert (2006), mesej bersasaran boleh dibahagikan kepada tiga bahagian. Ini termasuk mesej bersasaran untuk jangka masa panjang, pertengahan dan jangka masa pendek. Tambahan lagi, mesej bersasaran harus selaras dengan visi, misi dan prinsip organisasi serta menyumbang kepada misi organisasi. Dalam kajian Abdul Samad (2015), beliau berpendapat bahawa pendedahan, pemakluman dan penyebaran maklumat melalui peranan yang dimainkan oleh pihak pengurusan tertinggi sesebuah organisasi akan memberi kesan kepada kakitangan untuk terus bergerak mengikut hala tuju organisasi.

Elemen seterusnya, pemilihan dan penggunaan alat komunikasi dapat difahami sebagai alat penghubung atau jalinan komunikasi antara dua atau lebih individu. Samsudin (1993)

berpendapat pemilihan alat komunikasi harus mengikut hierarki keberkesanan komunikasi seperti tahap pertama mengambil kira bahasa hubungan dua hala, tahap kedua harus melalui komunikasi dua hala, tetapi tidak bersemuka. Tahap ketiga, komunikasi yang kurang berkesan adalah melalui proses satu hala sahaja seperti menulis surat atau laporan. Mohd Hazim dan Lokman (2014) berpendapat bahawa pihak pengurusan seharusnya dapat memanfaatkan perkembangan teknologi pada masa kini. Ini kerana, terdapat pelbagai aplikasi seperti *WhatsApp*, *Telegram*, *WeChat*, *Facebook* dan sebagainya yang menjadikan komunikasi boleh dilakukan tanpa halangan. Sementara itu, Ahlam (2016) berpandangan teknologi komunikasi memberi kesan positif kepada organisasi dan pengurus atasannya. Ini kerana, aktiviti dalam organisasi dapat diperbaiki dengan bantuan teknologi komunikasi dan ia memerlukan kerjasama serta komitmen semua pihak bagi memastikan teknologi yang dipilih akan memberi kesan positif. Kajian juga mendapati organisasi yang cekap menggunakan teknologi komunikasi akan lebih cepat mencapai matlamat dan mampu memberi daya saing kepada organisasi yang lain.

Penilaian berterusan adalah elemen ke empat dalam Model Komunikasi Strategik yang merupakan usaha pengurusan organisasi untuk menilai serta menambah baik amalan komunikasi yang digunakan secara berterusan (Rosli, 2016). Hal ini turut ditambah oleh Low, Siti Zaleha dan Hishamuddin (2007) yang berpendapat bahawa peringkat penilaian harus dilakukan bersama-sama oleh pihak pengurusan dan kakitangan. Penyertaan kakitangan akan meningkatkan penerimaan mereka semasa peringkat pelaksanaan. Kamaruzzaman et al. (2013) dalam kajiannya turut menekankan bahawa salah satu kaedah terbaik bagi organisasi untuk mengetahui sama ada pelaburan latihan mereka menguntungkan atau sebaliknya adalah melalui proses penilaian yang cekap dan sistematik. Meskipun beliau melihat dari perspektif pelaburan latihan, namun beliau berpendapat perkaitan antara peranan komunikasi adalah penting dalam melancarkan agenda latihan dalam organisasi. Kaedah penilaian latihan yang mengambil kira pengaruh komunikasi terhadap proses penyampaian ilmu dan kemahiran amat diperlukan. Seterusnya, membuatkan penilaian yang dihasilkan lebih teliti dalam meramal keberkesanan latihan. Kajian beliau telah menghasilkan satu penilaian secara berterusan daripada perspektif komunikasi yang dapat memberikan pemahaman terhadap pengaruh komunikasi dalam kejayaan latihan. World Health Organization (WHO) (2017) menyatakan bahawa penilaian berterusan komunikasi perlu melihat kepada mesej, elemen yang digunakan dan penyertaan khalayak. Penilaian ini juga akan melihat kepada penambahbaikan penerimaan mesej dan aktiviti komunikasi dalam organisasi. Sementara itu, David (2001) berpendapat bahawa penilaian strategi adalah penting untuk menilai kekuatan organisasi. Penilaian yang dilakukan pada masa yang sesuai boleh menyedarkan organisasi mengenai masalah atau potensi masalah sebelum situasi menjadi kritikal.

Seterusnya, ialah elemen yang ditambah oleh pengkaji, iaitu perancangan komunikasi. Berdasarkan kajian yang dijalankan oleh McLean dan Egan (2008) perancangan adalah proses berterusan dalam membantu pemimpin untuk berfikir lebih kritikal dan fleksibel. Mereka berhujah bahawa proses perancangan adalah suatu proses kompleks dan memerlukan individu yang berkepakaran untuk membimbing semasa proses membuat perancangan. Dalam kajian yang dijalankan oleh Arasa dan K'Obonyo (2012) membuktikan bahawa perancangan dan prestasi syarikat mempunyai hubungan yang kuat antara keduanya. Kaedah perancangan termasuk mengenal pasti matlamat, melihat kembali ruang lingkup perniagaan, mengenal pasti

masalah syarikat, memperbaiki pelaksanaan, penilaian serta mengawal sistem menunjukkan kaedah tersebut mempunyai hubungan yang positif dengan prestasi syarikat. Ini disokong oleh Samsuni dan Zakaria (2005), yang berpendapat bahawa perancangan yang strategik merupakan aspek utama dalam menetapkan hala tuju organisasi supaya strategi dan perkhidmatan yang diberikan sentiasa dikemas kini, relevan dan memenuhi keperluan semasa.

Manakala budaya kerja menuntut kepada integriti. Integriti dalam ketepatan waktu, integriti dalam menyampaikan maklumat, integriti dalam memberi perkhidmatan terbaik, integriti dalam berhubung dengan ketua jabatan, rakan sekerja dan juga kakitangan sokongan (Institut Integriti Malaysia & Pelan Integriti Nasional, t.th.). Prasetyo (2011) berpendapat bahawa budaya kerja berupaya mengubah komunikasi tradisional menjadi perilaku pengurusan moden, sehingga tertanam kepercayaan dan semangat kerjasama yang tinggi. Dalam kajian yang dijalankan oleh Suhana dan Kartini (2015), mematuhi arahan pihak atasan merupakan perkara penting yang mesti dimainkan oleh kakitangan. Fokus kepada tugas menjadikan kakitangan itu produktif dan setiap tugas akan dapat diselesaikan dengan cepat. Selain itu, budaya kerja juga bermanfaat tatkala pegawai atasan saling memerlukan kerjasama dari rakan sekerja, namun budaya kerja ini memberi akibat buruk apabila pegawai tersebut bersikap ego dengan berpendapat bahawa beliau dapat bekerja sendiri tanpa bantuan orang lain (Wibowo, 2013). Disebabkan itu, David (2001) berpendapat strategi seharusnya berusaha untuk melindungi, mengutamakan dan membina aspek budaya yang dapat menyokong strategi baru yang dicadangkan. Aspek budaya yang bertentangan dengan strategi yang dicadangkan haruslah dikenal pasti dan diubah. Ini kerana, mengubah budaya organisasi untuk disesuaikan dengan strategi baru adalah lebih berkesan daripada mengubah strategi untuk menepati budaya sedia ada.

Oleh yang demikian, komunikasi strategik tidak lengkap tanpa wujud perancangan sebagai perkara utama sebelum mula merancang komunikasi di sesebuah organisasi. Individu utama yang perlu merancang semestinya pihak pengurusan organisasi. Pihak pengurusan tertinggi perlu merancang dan mengurus secara berstrategik bagi menentukan hala tuju organisasi yang mereka pertama. Ini penting kerana, perancangan yang teliti harus mengambil kira semua aspek dalaman dan luaran agar ia mendapat kelebihan persaingan dan seterusnya menguasai pasaran dan mendapat keuntungan yang lebih tinggi (Kassim, 2003). Komunikasi strategik juga dapat dilihat sebagai disiplin baharu berdasarkan beberapa andaian asas dan meliputi aktiviti komunikasi bagi semua jenis organisasi (Frandsen & Johansen, 2015). Dalam konteks kajian ini, komunikasi strategik memainkan peranan penting dalam komunikasi keorganisasian, terutama komunikasi antara pengurusan, kakitangan dan khalayak. Ia juga merujuk kepada proses komunikasi yang berlaku dalam organisasi yang melibatkan proses komunikasi ke atas, komunikasi mendatar dan komunikasi ke bawah. Hal ini, secara tidak langsung mempengaruhi keberkesanannya penyampaian mesej. Justeru, dengan gabungan elemen komunikasi strategik akan menghasilkan kualiti kerja yang baik dan memperbaiki amalan komunikasi dalam organisasi.

## METODOLOGI

Kajian ini menggunakan pendekatan kuantitatif dengan menumpukan kaedah analisis kandungan dan survei. Untuk analisis kandungan, pengkaji mengumpul dan menganalisis

sampel aduan pengguna yang dihantar kepada pihak KTMB melalui emel rasmi Unit Perkhidmatan Pelanggan KTMB yang dipilih secara rawak. Sebanyak 28 sampel aduan diperolehi dan kemudiannya dianalisis menggunakan *Statistical Package for Social Science Version 23 (SPSS)*.

Bagi kaedah survei pula, populasi kajian merangkumi kakitangan KTMB yang bertugas di Lembah Klang seramai 700 orang. Saiz sampel pula, melibatkan 248 orang responden yang dipilih secara sampel rawak berdasarkan Jadual Saiz Sampel Krejcie dan Morgan (1970) selepas mengambil kira jumlah kakitangan di Lembah Klang. Sampel rawak yang dimaksudkan adalah pengkaji menggunakan sampel bertujuan pada awal kajian bagi menguji bentuk soal selidik dan menentukan responden yang sesuai dengan tujuan kajian. Kemudiannya, pengkaji beralih kepada persampelan kelompok kerana persampelan ini sangat sesuai digunakan apabila populasi itu besar dan kawasan yang perlu diliputi itu adalah luas (Syed Arabi, 1998).

Sebanyak 250 set borang soal selidik diedarkan kepada organisasi dan hanya 200 set soal selidik yang lengkap diisi dan dipulangkan semula kepada pengkaji. Kajian ini menggunakan analisis deskriptif untuk mengenal pasti pola komunikasi yang digunakan oleh responden untuk berhubung sesama unit, antara unit dan antara organisasi KTMB dengan *stakeholder* dalam konteks keberkesanan penyampaian mesej. Bagi melihat hubungan pola komunikasi dengan amalan komunikasi strategik pula, kajian ini menggunakan analisis inferensi iaitu korelasi. Di samping itu, kajian ini turut menggunakan analisis inferensi dengan menumpukan kepada statistik regresi bagi menganalisis sejauh mana elemen komunikasi strategik iaitu perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja mempunyai pengaruh terhadap keberkesanan mesej yang disampaikan dalam kalangan kakitangan KTMB.

#### HASIL KAJIAN DAN PERBINCANGAN

Berdasarkan analisis deskriptif ke atas 200 maklumat demografi responden, 86.0 peratus terdiri daripada responden lelaki, manakala hanya 13.5 peratus lagi merupakan responden perempuan. Dilihat juga sebanyak 50.5 peratus dalam kajian ini terdiri daripada mereka yang berumur 18-29 tahun, 33.0 peratus berumur 30-40 tahun, kakitangan yang berumur antara 41-50 tahun hanya 5.5 peratus sahaja. Manakala, 11.0 peratus pula terdiri daripada mereka yang berumur 51 dan ke atas. Di samping itu, sebahagian besar responden dalam kajian ini memiliki tahap pendidikan SPM iaitu sebanyak 55.5 peratus dan diikuti dengan 41.5 peratus mempunyai STPM/Diploma dan hanya 2.0 peratus memiliki ijazah. Tambahan lagi, 12.5 peratus berkhidmat kurang daripada setahun, 31.5 peratus responden telah berkhidmat antara 1 hingga 5 tahun dan diikuti 30.0 peratus berkhidmat antara 6 hingga 10 tahun. Seterusnya, peratusan yang paling sedikit ialah responden yang berkhidmat antara 11 ke 20 tahun dengan memperoleh hanya 12.0 peratus. Manakala, responden yang berkhidmat selama 21 tahun ke atas memperoleh 13.5 peratus.

Selain daripada itu, responden turut diminta untuk mengisi lokasi, bahagian, unit atau stesen mereka bertugas. Hasil kajian menunjukkan KL Sentral memperoleh peratusan tertinggi lokasi responden bertugas iaitu sebanyak 14.5 peratus mewakili 29 responden dan diikuti oleh Stesen Sg. Buloh sebanyak 9.5 peratus mewakili 19 responden serta Stesen Rawang memperolehi peratusan sebanyak 6.5 peratus mewakili 13 responden. Manakala Stesen Kepong memperoleh 4.0 peratus atau 08 responden, diikuti Stesen Kuang hanya 3.5 peratus

atau 07 responden dan lain-lain stesen 62.0 peratus meliputi Stesen Angkasapuri, Bandar Tasik Selatan, Batang Kali, Batu Caves, Batu Tiga, Jalan Templer, Kuala Lumpur, Pelabuhan Klang, Jalan Kastam, Kajang, Kg. Batu, Kepong Sentral, Kg. Dato' Harun, Klang, UKM, Pantai Dalam, Putra, Seputeh, Rasa, Kuala Kubu Bharu, Midvalley, Padang Jawa, Petaling, Salak Selatan, Segambut, Sentul, Serdang, Serendah, Seri Setia, Setia Jaya, Shah Alam, Subang Jaya, Subang Skypark, Taman Wahyu, Teluk Gadong dan Teluk Pulai.

Analisis deskriptif bagi elemen pola komunikasi pula mendapati bahawa purata min yang dicatat bagi setiap elemen ialah komunikasi secara mendatar ( $\text{min}=4.23$ ), komunikasi luar organisasi ( $\text{min}=4.14$ ), komunikasi secara berpenjuru ( $\text{min}=3.61$ ), komunikasi ke bawah ( $\text{min}=3.52$ ), komunikasi ke atas ( $\text{min}=3.41$ ). Berdasarkan bacaan min daripada kelima-lima elemen tersebut, menunjukkan elemen pola komunikasi berada pada tahap tinggi dan sederhana. Ia berdasarkan *Rule of thumb* dalam menentukan tahap iaitu, tahap tinggi,  $\text{min}=3.67-5.00$ , sederhana,  $\text{min}=2.34-3.66$  dan rendah,  $\text{min}=1.00-2.33$ . Oleh yang demikian, berdasarkan nilai min yang diperoleh, dapat dilihat bahawa pola komunikasi yang kerap diamalkan oleh responden adalah komunikasi secara mendatar. Ini kerana, komunikasi secara mendatar memperoleh min tertinggi dan termasuk dalam kategori yang memperoleh min tinggi. Pola komunikasi yang kedua adalah pola komunikasi luar organisasi, komunikasi jenis ini dipersetujui oleh responden sebagai salah satu pola yang biasa diamalkan dan termasuk dalam kategori yang memperoleh min tinggi. Ini diikuti oleh komunikasi secara berpenjuru, komunikasi ke bawah dan komunikasi ke atas yang dikategorikan sebagai min sederhana. Oleh yang demikian, dapat dilihat bahawa pola komunikasi yang betul-betul diamalkan oleh KTMB adalah pola komunikasi mendatar dan pola komunikasi luar organisasi apabila kedua-dua pola ini memperoleh purata min tinggi.

Dapatkan tentang pola yang digunakan ini dapatlah disimpulkan bahawa, kakitangan lebih banyak berkomunikasi sesama rakan sekerja dan dengan pelanggan. Ini bersesuaian dengan keadaan perkhidmatan KTMB itu sendiri di mana staf barisan hadapan seperti penjaga kaunter, dan stesen master lebih dekat dengan pelanggan, dengan itu lebih banyak berurusan dengan pelanggan dan sesama rakan sejawatan berbanding dengan kakitangan di atasnya mahupun di bawahnya. Komunikasi ke atas adalah paling rendah minnya dan ini menunjukkan komunikasi kurang berlaku di antara staf dengan kakitangan di atasnya. Hal ini sepatutnya perlu diambil berat oleh pihak KTMB kerana pola komunikasi bawah ke atas adalah penting untuk melaporkan kelemahan operasi perkhidmatan, kerana melalui nyalah penambah baikan boleh dilakukan bagi meningkatkan kualiti perkhidmatan. Bukan sahaja komunikasi ke atas menunjukkan min yang sederhana, komunikasi ke bawah juga menunjukkan trend yang sama. Justeru kurang berlaku interaksi antara kakitangan pihak atas dengan kakitangan di bawah, dan ini sebenarnya boleh menjaskan aliran maklumat yang cekap dan menampakkan kelemahan organisasi.

Pola komunikasi merupakan elemen penting dalam menjamin kejayaan organisasi kerana ia berupaya membentuk suasana bekerja yang harmoni apabila pihak pengurusan berjaya mengaplikasikan elemen tersebut dalam komunikasi berkesan. Justeru itu, komunikasi berkesan memerlukan pemilihan pola komunikasi, baik melalui saluran komunikasi formal mahupun tidak formal, bagi memastikan mesej yang dibawa berjaya difahami dan sampai kepada sasaran yang sepatutnya. Jika dilihat pola komunikasi yang digunakan oleh pihak KTMB,

pola vertikal merupakan pola yang paling kurang digunakan khususnya pola dari bawah ke atas, dengan min yang plaing rendah berbanding empat pola yang lain. Implikasi daripada kurangnya penggunaan pola tersebut menyebabkan pihak pengurusan tidak mendapat maklumat tentang masalah yang dihadapi oleh peringkat bawahan, sedangkan maklumat daripada peringkat tersebut adalah sangat penting untuk menambah baik perkhidmatan dan memelihara kepuasan pelanggan. Ini kerana pelanggan lebih banyak berinteraksi dengan kakitangan yang berada di barisan hadapan. Segala teguran, rungutan dan kritikan daripada pelanggan akan sampai di peringkat barisan hadapan terlebih dahulu dan adalah menjadi tanggungjawab bahagian ini untuk menyampaikannya pula ke peringkat yang lebih tinggi untuk membuat keputusan.

Pola komunikasi atas ke bawah juga menunjukkan min yang sederhana. Ini bermakna pihak pengurusan atas kurang berinteraksi dengan pihak bawahan sebagaimana pihak bawahan kurang berinteraksi dengan pihak atasan. Kurangnya interaksi di antara dua pihak ini boleh mewujudkan jurang komunikasi dan kesannya aliran komunikasi tidak berjalan dengan lancar, seterusnya mengganggu aliran maklumat. Apabila aliran maklumat terganggu, lama kelamaan hal ini boleh melumpuhkan sebuah organisasi kerana organisasi mudah terdedah dengan krisis sama ada yang berpunca dari dalam maupun luar organisasi.

Seterusnya, analisis kedua yang digunakan dalam kajian ini ialah statistik inferensi iaitu ujian Korelasi Pearson bagi melihat hubungan antara pemboleh ubah pola komunikasi dengan komunikasi strategik berdasarkan saiz kesan *Guilford's Rule of Thumb*. Berdasarkan jadual saiz kesan dan tafsiran *Guilford's Rule of Thumb* yang telah ditetapkan, secara keseluruhannya, hubungan korelasi elemen pola komunikasi dengan elemen komunikasi strategik mempunyai hubungan yang sederhana kuat kerana nilai saiz kesan yang diperolehi ialah  $r = 0.672^{**}$  dan nilai aras signifikan ialah .000.

Jadual 1: Ujian korelasi pola komunikasi terhadap komunikasi strategik

Pemboleh Ubah	Komunikasi Strategik
Pola Komunikasi	.672**
Sig. (2-tailed)	.000
N	200

Jadual 1 menunjukkan hasil ujian Korelasi Pearson Pola Komunikasi dengan elemen Komunikasi Strategik. Kajian ini telah menunjukkan pekali korelasi bagi pemboleh ubah pola komunikasi dan komunikasi strategik adalah besar iaitu .672 hingga 1.00 iaitu nilai *Pearson Correlation (r)* bersamaan  $0.672^{**}$ , dan paras signifikan (*p*) bersamaan .000. Ini menunjukkan bahawa pola komunikasi dan komunikasi strategik mempunyai hubungan yang sederhana kuat. Maka, ini menunjukkan bahawa terdapat hubungan positif yang signifikan antara pola komunikasi dengan komunikasi strategik. Hal ini, menjelaskan bahawa semakin pelbagai pola komunikasi yang diterapkan dalam organisasi, maka semakin baik strategi komunikasi yang digunakan.

Seterusnya, bagi melihat dengan lebih jauh kepentingan komunikasi strategik dalam konteks keberkesanan penyampaian mesej, maka kajian ini akan cuba melihat pengaruh komunikasi strategik dari segi perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja

terhadap keberkesanan penyampaian mesej. Selaras dengan itu, ujian regresi dijalankan bagi melihat pengaruh tersebut.

Jadual 2: Rumusan model regresi komunikasi strategik terhadap keberkesanan penyampaian mesej

Model	R	R Kuasa Dua	R Kuasa Dua Yang Diselaraskan	Ralat Piawaian Anggaran
1	.754a	.569	.556	3.95143

a. *Peramal: (tetap), perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja.*

Jadual 2 menunjukkan bahawa nilai regresi antara boleh ubah komunikasi strategik dengan keberkesanan penyampaian mesej yang ditunjukkan oleh R adalah .754. R Kuasa Dua Yang Diselaraskan bernilai .556 menunjukkan bahawa komunikasi strategik menyumbang sebanyak 56 peratus varian ke atas keberkesanan penyampaian mesej.

Jadual 3: Analisis ANOVA komunikasi strategik terhadap keberkesanan penyampaian mesej

Model	Jumlah Kuasa Dua	Darjah Kebebasan	Min Kuasa Dua	Nilai F	Signifikan
1	Regresi	3977.252	6	662.875	42.454
	Ralat	3013.468	193	15.614	
	Jumlah	6990.720	199		

a. *Pemboleh ubah bersandar: Keberkesanan penyampaian mesej*

b. *Peramal: (tetap), perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja.*

Jadual 3 menunjukkan hasil analisis ANOVA bagi mengesahkan model awal kedua-dua boleh ubah komunikasi strategik dan keberkesanan penyampaian mesej. Hasil dapatan menunjukkan keseluruhan model mempunyai nilai nisbah  $F = 42.454$  dengan nilai signifikan  $p = .000$ . Pemboleh ubah bebas ini (b: perancangan komunikasi, sokongan pengurusan atasan, mesej bersasaran, pemilihan dan penggunaan alat komunikasi, penilaian berterusan dan budaya kerja) akan diteliti dengan lebih mendalam. Berdasarkan Jadual 4, koefisien analisis regresi pelbagai ditunjukkan bagi mengenal pasti boleh ubah manakah yang paling menyumbang terhadap boleh ubah keberkesanan penyampaian mesej.

Jadual 4: Analisis koefisien regresi pengaruh komunikasi strategik terhadap keberkesanan penyampaian mesej

Model	Ralat Piawaian Koefisien	Piawaian Koefisien Beta ( $\beta$ )	Nilai t	Signifikan
1	(tetap)	2.716	3.403	.001
	Perancangan komunikasi	.065	.325	3.932
	Sokongan pengurusan atasan	.068	-.027	-.422
	Mesej bersasaran	.156	.214	2.657
	Pemilihan dan penggunaan alat komunikasi	.115	.130	2.010
	Penilaian berterusan	.163	.161	1.900
	Budaya kerja	.119	.085	1.172

a. *Pemboleh ubah bersandar: Keberkesanan penyampaian mesej*

Berdasarkan Jadual 4, dapat dilihat bahawa elemen perancangan komunikasi adalah paling tinggi mempengaruhi keberkesanan penyampaian mesej apabila memperoleh nilai  $\beta=.325$  dan mencapai tahap signifikan  $p<.000$ . Ini diikuti dengan elemen mesej bersasaran dengan nilai  $\beta=.214$  mencapai tahap signifikan  $p<.05$ . Seterusnya, diikuti oleh elemen penilaian berterusan ( $\beta=.161$ ) mencapai tahap signifikan  $p<.05$  serta pemilihan dan penggunaan alat komunikasi ( $\beta=.130$ ) mencapai tahap signifikan  $p<.05$ . Hal ini, berbeza dengan elemen budaya kerja dan sokongan pengurusan atasan apabila budaya kerja mencapai tahap signifikan  $p>.05$ , dengan nilai  $\beta=.085$  dan sokongan pengurusan atasan mencapai tahap signifikan  $p>.05$  dengan nilai  $\beta=-.027$ . Justeru itu, dapat dirumuskan bahawa elemen perancangan komunikasi, mesej bersasaran, penilaian berterusan serta pemilihan dan penggunaan alat komunikasi memberi pengaruh yang signifikan terhadap keberkesanan penyampaian mesej. Manakala, elemen bagi budaya kerja dan sokongan pengurusan atasan tidak memberi pengaruh ke atas keberkesanan penyampaian mesej.

Perancangan komunikasi merupakan elemen yang paling berpengaruh dari segi keberkesanan penyampaian mesej. Arasa dan K'Obonyo (2012) mendapat, perancangan komunikasi mempunyai hubungan positif dengan prestasi syarikat. Prestasi syarikat dalam konteks ini termasuklah pelaksanaan strategi, penilaian dan kawalan sistem. Dengan penambahan elemen perancangan komunikasi dalam model asal Barret, model regresi yang telah ditambah baik tersebut menunjukkan peningkatan varian. Ini menunjukkan model yang diubahsuai dapat menerangkan dengan lebih baik tentang keberkesanan penyampaian mesej berbanding model asal.

#### KESIMPULAN

Secara keseluruhan, hasil kajian menunjukkan terdapat perkaitan antara aduan pengguna dengan pola komunikasi dan komunikasi strategik yang diamalkan dalam KTMB. Ini kerana, hasil dapatan yang diperoleh daripada analisis kandungan jelas menunjukkan bahawa aduan dihantar secara kerap kepada KTMB. Melalui hasil kajian yang diperoleh, kategori aduan yang tertinggi adalah budaya kerja, diikuti pemilihan dan penggunaan alat komunikasi, penilaian berterusan, mesej bersasaran dan terakhir kategori sokongan pengurusan atasan. Kategori aduan ini jelas menunjukkan bahawa ia mempunyai kaitan dengan pola komunikasi dan amalan komunikasi strategik yang berlaku dalam KTMB.

Di samping itu, dapat dilihat bahawa KTMB mengamalkan komunikasi secara mendatar dan komunikasi luaran dengan kerap berbanding pola komunikasi yang lain. Ini menunjukkan bahawa kakitangan banyak berkomunikasi dengan rakan setugas dan pengguna, namun komunikasi ke atas, komunikasi ke bawah dan komunikasi secara berpenjuru adalah kurang berlaku di KTMB. Dengan adanya pola komunikasi tersebut, boleh menjadi faktor kepada peningkatan aduan pengguna apabila kakitangan mungkin terlepas maklumat, mengalami salah faham dan lain-lain, sekaligus menyebabkan kakitangan tidak memperoleh maklumat yang tepat. Disebabkan itu, hasil kajian menunjukkan bahawa pola komunikasi mempunyai hubungan yang sederhana kuat dengan komunikasi strategik. Manakala, elemen komunikasi strategik seperti perancangan komunikasi, mesej bersasaran, penilaian berterusan serta pemilihan dan penggunaan alat komunikasi mempunyai pengaruh yang signifikan terhadap

keberkesanan penyampaian mesej. Namun, elemen bagi sokongan pengurusan atasan dan budaya kerja tidak memberi pengaruh yang signifikan apabila mencapai tahap signifikan  $p>.05$ .

Oleh yang demikian, pemilihan komunikasi strategik yang tepat berupaya membentuk pola komunikasi yang berkesan dalam organisasi, sekaligus mengurangkan aduan terhadap perkhidmatan. Secara keseluruhan, kajian ini berjaya mencapai objektif yang telah ditetapkan, hasil kajian juga membuktikan bahawa komunikasi strategik mempunyai pengaruh terhadap keberkesanan penyampaian mesej apabila organisasi mengaplikasikan elemen seperti perancangan komunikasi, mesej bersasaran, pemilihan dan penggunaan alat komunikasi dan penilaian berterusan.

Kajian ini diharapkan dapat membantu organisasi dalam memperbaiki amalan komunikasi terutama dari segi pemilihan strategi komunikasi secara berkesan dalam organisasi. Ini kerana, elemen yang terdapat dalam komunikasi strategik dapat membantu organisasi untuk merancang, melaksana dan menilai komunikasi secara berkesan. Ia juga penting bagi sesebuah organisasi untuk melihat semula strategi komunikasi yang digunakan sebelum ini. Di samping itu, sesebuah organisasi disaran agar mengkaji dan mengambil kira sebarang strategi sebelum dilaksanakan agar ia berjaya menetapi matlamat yang digariskan. Ini kerana, tanpa strategi komunikasi berkesan, agak sukar bagi sesebuah organisasi untuk melaksanakan aktiviti komunikasi dalam kalangan kakitangan. Sesebuah organisasi perlu menilai kembali aktiviti komunikasi yang sedang dilaksanakan terutama dari segi pemilihan dan penggunaan alat komunikasi, sasaran mesej, penilaian berterusan dan budaya kerja. Ini kerana, faktor tersebut boleh menjadi sebab penyampaian mesej tidak berjalan dengan baik.

Hasil kajian juga mendapati perancangan komunikasi adalah elemen pertama yang perlu dititikberatkan sebelum organisasi mengambil tindakan untuk melaksanakan sebarang strategi. Ini kerana, perancangan adalah langkah awal sebelum memasuki langkah yang seterusnya dan ia merupakan perkara yang paling penting dalam pengurusan organisasi kerana ia termasuk lima elemen utama merangkumi analisis khalayak, objektif komunikasi, saluran komunikasi, tanggungjawab dan tempoh masa (Newman, 2016). Justeru, sebelum melaksanakan strategi komunikasi, organisasi perlu merancang komunikasi terlebih dahulu sebelum elemen seperti sokongan pengurusan atasan, mesej bersasaran dan lain-lain elemen dilaksanakan. Akhir sekali, organisasi boleh melihat kepada budaya kerja yang ada dalam organisasi bagi menilai sama ada ia boleh mengganggu pelaksanaan strategi komunikasi atau tidak.

Hasil kajian juga ini memberi implikasi kepada Model Komunikasi Strategik Barrett (2002) apabila wujudnya kesesuaian dapatan kajian dengan elemen yang digunakan. Melalui penggunaan model tersebut, pengkaji dapat menguji dua elemen komunikasi strategik yang memberi implikasi kepada Model Komunikasi Strategik. Perancangan komunikasi dan budaya kerja adalah elemen yang ditambah oleh pengkaji bagi melihat perkaitannya dengan keberkesanan penyampaian mesej. Empat elemen sedia ada yang terkandung dalam Model Komunikasi Strategik, kini menjadi enam elemen. Penambahan dua elemen tersebut menunjukkan model yang ditambah baik dapat menerangkan pengaruh komunikasi strategik dengan lebih baik ke atas keberkesanan penyampaian komunikasi melalui peningkatan nilai varians. Hasil dapatan menunjukkan bahawa berlaku peningkatan varians sebanyak 56 peratus berbanding model asal Barret hanya 53 peratus sahaja. Ini bermakna model yang diubahsuai

dapat menerangkan dengan lebih baik tentang keberkesanan penyampaian mesej berbanding model asal.

#### PENGHARGAAN

Kertas kerja ini terhasil daripada kajian tentang komunikasi strategik di KTMB melalui dana GUP-2017-104.

#### BIODATA

*Maizatul Haizan Mahbob* ialah pensyarah kanan di Pusat Komunikasi dan Masyarakat Digital, Fakulti Sains Sosial dan Kemanusiaan, UKM. Emel: maiz@ukm.edu.my

*Wan Idros Wan Sulaiman* ialah pensyarah kanan di Pusat Komunikasi dan Masyarakat Digital, Fakulti Sains Sosial dan Kemanusiaan, UKM. Emel: wiws@ukm.edu.my

*Wan Amizah Wan Mahmud* ialah pensyarah kanan di Pusat Komunikasi dan Masyarakat Digital, Fakulti Sains Sosial dan Kemanusiaan, UKM. Emel: wan\_amizah@ukm.edu.my

#### RUJUKAN

- Ab. Aziz Yusof. (2010). *Gelagat organisasi: Satu pendekatan strategik*. Sintok: Penerbit Universiti Utara Malaysia.
- Abdul Mu'a'ti Ahmad. (2006). *Komunikasi di tempat kerja*. Kuala Lumpur: Dewan Bahasa dan Pustaka.
- Abdul Samad Kechot. (2015). Bentuk komunikasi dalam menangani peranan kepimpinan Badan Bukan Kerajaan (NGO) perfileman. *Jurnal Komunikasi: Malaysian Journal of Communication*, 31(2), 423- 439.
- Ahlam Abdul Aziz. (2016). Peranan teknologi komunikasi dan sumbangannya ke arah perkembangan komunikasi dalam organisasi yang berkesan. *Forum Komunikasi*, 11(2), 51-64.
- Aizzat Mohd. Nasurdin, Intan Osman, & Zainal Ariffin Ahmad. (2006). *Pengantar pengurusan* (Siri pendidikan jarak jauh). Kuala Lumpur: Utusan Publications & Distributors Sdn Bhd.
- Arasa, R., & K'Obonyo, P. (2012). The relationship between strategic planning and firm performance. *International Journal of Humanities and Social Science*, 2(22), 201-213.
- Barret, D. J. (2006). *Leadership communication: A communication approach for senior-level managers*. Emerald Group Publishing Limited. Retrieved from <https://hdl.handle.net/1911/27037>
- Bharadwaj, A. (2014). Planning internal communication profile for organizational effectiveness. *IIM Kozhikode Society & Management Review*, 3(2), 183-192. doi: 10.1177/2277975214542059
- Butler, C. J. (2010). Internal and lateral communication in strategic alliance decision making. *An International Journal*, 15(3), 698-712.
- Che Hasniza Che Noh, & Ab Aziz Yusof. (2011). *Kemahiran komunikasi interpersonal dalam organisasi*. Kuala Terengganu: Penerbit Universiti Malaysia Terengganu.
- Clampitt, P. G. (2005). *Communicating for managerial effectiveness* (Edisi ke-3). London: Sage Publications.
- David, F. R. (2001). *Pengurusan strategik: Konsep dan kes* (Mohd Hizam Hanafiah (terj.) & Mohd Khairuddin Hashim (pnyt), Edisi ke-8). Malaysia: Pearson Malaysia Sdn. Bhd.
- Day, C., Niekerk, M. V., & Okumus, F. (2017). The important of strategic communication during change management at Palm College of Hospitality and event management. *Journal of Hospitality & Tourism*, 5(3), 87-92.
- Falkheimer, J. (2014). The power of strategic communication in organizational development. *International Journal of Quality and Service Sciences*, 6(2/3), 124-133. Retrieved on 11 Januari 11, 2018, from <https://doi.org/10.1108/IJQSS-01-2014-0007>
- Frandsen, F., & Johansen, W. (2015). Organizations, stakeholders, and intermediaries: Towards a general theory. *International Journal of Strategic Communication*, 9(4), 253-271. doi: 10.1080/1553118X.2015.1064125
- Griffin, R. W., & Ebert, R. J. (2006). *Bisnis* (Jilid 1, Edisi ke-8). Jakarta: Penerbit Erlangga.
- Government Communication Service. (2014). *Writing a communication strategy*. London: Author.

- Institut Integriti Malaysia & Pelan Integriti Nasional. (t.th.). *Budaya etika dan integriti membentuk budaya kerja cemerlang*. Retrieved on Julai 20, 2017, from [http://www.audit.upm.edu.my/berita/budaya\\_etika\\_dan\\_integriti\\_membentuk\\_budaya\\_kerja\\_cemerlang-20715](http://www.audit.upm.edu.my/berita/budaya_etika_dan_integriti_membentuk_budaya_kerja_cemerlang-20715)
- Kamaruzzaman Abdul Manan, Shuhaida Md Nor, & Bahiyah Omar. (2013). Model penilaian Kirkpatrick: Mengkaji pengaruh komunikasi terhadap keberkesanan latihan. *Jurnal Komunikasi: Malaysian Journal of Communication*, 29(2), 31- 50.
- Kartini Mat Rashid, Asri Salleh, & Adlan Ahmad Bakri. (2012). The effect of communication between superior and subordinate. *E-Academia Journal*, 1(1), 104-107.
- Kassim Thukiman. (2003). Perancangan dan pengurusan strategik organisasi: Suatu analisis. *Jurnal Kemanusiaan*, 16(1), 1-9.
- Krejcie, R. V., & Morgan, D. W. (1970). Determining sample size for research activities. *Educational and Psychological Measurement*, 30(3), 607-610. doi: 10.1177/001316447003000308
- Low Hock Heng, Siti Zaleha Omain, & Hishamuddin Md Som. (2007). Perkongsian pengetahuan di kalangan industri kecil dan sederhana di Malaysia (Unpublished Project Report, Universiti Teknologi Malaysia). Retrieved from <http://eprints.utm.my/id/eprint/2676/>
- Mahoney, J. (2013). *Strategic communication: Principles and practice*. South Melbourne: Oxford University Press.
- McLean, G. N., & Egan, T. M. (2008). Applying organization development tools in scenario planning. *Advances in Developing Human Resources*, 10(2), 240-257. Retrieved from <http://journals.sagepub.com/doi/pdf/10.1177/1523422307313328>
- Mohamad Said Awang, & Zulhamri Abdullah. (2012). Hubungan antara pertimbangan pemimpin, pertukaran komunikasi dan komitmen organisasi. *Jurnal Komunikasi: Malaysian Journal of Communication*, 28(1), 121-136.
- Mohd Hazim Asran Abdullah, & Lokman Mohd Tahir. (2014). Amalan perkongsian ilmu di Institusi Pendidikan Teknikal Mara. *International Seminar on Technical and Vocational Education 2014 (TVEIS 2014)* (hlm. 384-405).
- Mohd Zuri Ghani, & Aznan Che Ahmad. (2008). Strategi untuk mengembangkan kemahiran berkomunikasi kanak-kanak berkeperluan khas. *Pendidikan Khas*, 8(2), 5-13.
- Mujiasih, E., & Ratnaningsih, I. Z. (2012). *Meningkatkan work engagement melalui gaya kepemimpinan transformasional dan budaya organisasi*. Retrieved from <https://www.coursehero.com/file/17314151/ARTIKEL-55/>
- Newman, A. (2016). Communication planning: A template for organizational change. *Cornell Hospitality Report*, 16(3), 3-6.
- Newstrom, J. W. (2015). *Organizational behaviour: Human behaviour at work* (14th ed.). United States of America: McGraw Hill.
- Pate, R. R., & Buchner, D. M. (2013). *Implementing physical activity strategies*. United States: Human Kinetics.
- Peters, T. J., & Waterman, R. H. (1992). *Mencari kecemerlangan: Rahsia kejayaan Amerika Syarikat* (Edisi Bahasa Malaysia, terj. Wan Sakinah Wan Ibrahim). Kuala Lumpur: Dewan Bahasa dan Pustaka.

- Prasetyo, A. E. (2011). *Pengaruh budaya kerja terhadap perilaku kerja dan kinerja karyawan pada PT. Bank Pembangunan Daerah (BPD) Banyuwangi* (Tesis Sarjana, Fakultas Ekonomi, Universitas Jember, Indonesia).
- Ressler, W. H. (2012). When “Play for Pink” became playing for each other: Team cohesion as a goal of socially responsible strategic communication. *Case Studies in Strategic Communication*, 1(4), 38-68.
- Rosli Mohammed. (2016). *Audit komunikasi organisasi*. Sintok: Penerbit Universiti Utara Malaysia.
- Samsudin A. Rahim. (1993). *Komunikasi asas*. Kuala Lumpur: Dewan Bahasa dan Pustaka.
- Samsuni Mohd Nor, & Zakaria Abd Hadi. (2005). Perancangan strategik organisasi melalui pelaksanaan balanced score card. *Jurnal Pengurusan Awam*, 4(1), 64-76.
- Suhana Saad, & Kartini Aboo Talib. (2015). Implimentasi budaya kerja Jepun dalam organisasi di Malaysia. *Malaysia Journal of Society and Space*, 11(6), 1-10.
- Syed Arabi Idid. (1998). *Kaedah penyelidikan komunikasi dan sains sosial*. Kuala Lumpur: Dewan Bahasa dan Pustaka.
- Thomas, G. F., & Stephens, K. J. (2015). An introduction to strategic communication. *International Journal of Business Communication*, 52(1), 3-11.
- Upik, A. S. E. P. (2016). *Strategi komunikasi program “Anti Pemadaman (Zero Trip Feeder) PT PLN (Persero) area Surakarta PT PLN (PERSERO) area Surakarta dalam mengurangi pemadaman listrik tahun 2014* (Tesis Sarjana, Program Studi Ilmu Komunikasi Fakultas Ilmu Sosial dan Politik, Universitas Sebelas Maret Surakarta).
- Walker, R. (2011). *Strategic management communication for leaders* (2nd ed.). USA: South-Western Cengage Learning.
- Wan Idros Wan Sulaiman. (2015). *Hubungan pengurusan maklumat dengan kepuasan komunikasi dalam kalangan kakitangan kumpulan sokongan sektor awam* (PhD thesis, Universiti Putra Malaysia).
- Wan Idros Wan Sulaiman, & Maizatul Haizan Mahbob. (2014). Kesignifikanan model kepuasan komunikasi dalam konteks pengurusan maklumat sektor awam. *Jurnal Komunikasi: Malaysian Journal of Communication*, 30(1), 97-115.
- Wan Idros Wan Sulaiman, & Maizatul Haizan Mahbob. (2015). Hubungan komunikasi keorganisasian dengan perancangan strategik modal insan Universiti Kebangsaan Malaysia. *Jurnal Komunikasi: Malaysian Journal of Communication*, 31(2), 1-14.
- Wibowo, A. A. (2013). *Pengaruh iklim komunikasi organisasi dan budaya kerja terhadap kinerja guru SMK negeri 11 Semarang* (Tesis Sarjana, Program Pendidikan Ekonomi, Fakultas Ekonomi, Universitas Negeri Semarang).
- World Health Organization. (2017). WHO strategic communications framework for effective communications. Geneva: Author.
- Zafir Mohd Makbul, & Fuh Mohamad Hasun. (2003). *Mengurus latihan dan kerjaya: Ke arah meningkatkan kesetiaan pekerja*. Petaling Jaya: Leeds Publications.
- Zawiyah Mohammad Yusof. (2009). *Kemahiran komunikasi*. Ampang: Dawama Sdn. Bhd.